



## CONVENIO ENTRE O INSTITUTO GALEGO DE PROMOCIÓN ECONÓMICA E A ASOCIACIÓN STARTUP GALICIA PARA REALIZACIÓN DE ACTIVIDADES DE APOIO AO EMPRENDIMENTO INNOVADOR

### REUNIDOS

**Dunha parte**, Fernando Guldrís Iglesias no nome e representación do Instituto Galego de Promoción Económica -en diante, Igape-, con NIF Q6550010J e domicilio social en Edificio Igape, Complexo Administrativo San Lázaro, s/n, 15707 Santiago de Compostela, na súa calidade de director xeral. Está facultado para este acto en virtude da delegación de facultades do 23 de decembro de 2016 do presidente do Igape feita pública mediante Resolución do 25 de xaneiro de 2017 (DOG nº 23, do 2 de febreiro de 2017).

**Doutra parte**, Daniel Cerqueiro García, con DNI 34891691R, na súa calidade de presidente da Asociación Startup Galicia -en diante, Startup Galicia-, con domicilio social en Rúa da Senra, 13 – 2ºB, 15702 Santiago de Compostela e NIF G27845213, con facultades para o outorgamento do presente documento en virtude do artigo 22 dos vixentes estatutos de Startup Galicia.

Recoñécense reciprocamente competencia xurídica suficiente para subscribir o presente convenio e polo tanto,

### MANIFESTAN

I. Que o Igape é a axencia de desenvolvemento rexional de Galicia cuxa natureza xurídica é a de ente de dereito público con personalidade xurídica e patrimonio propios. Entre os seus obxectivos están os de fomentar a creación de novas empresas e facilitar servizos de asesoramento, planificación, xestión, financiamento, formación, localización, seguimento e, en xeral, calquera outro que poida contribuír á creación e desenvolvemento das empresas e a mellora competitiva e innovación do sistema produtivo galego. Asemade, a Lei 9/2013, do 19 de decembro, do emprendemento e da competitividade económica de Galicia, establece que o Igape terá a consideración de entidade instrumental do sector público autonómico con competencias en materia de emprendemento.

II. Startup Galicia é unha entidade sen ánimo de lucro de carácter multisectorial, constituída o 28 de novembro de 2016 co obxectivo de converterse nunha comunidade aberta, forte, dinámica, conectada e colaborativa de persoas ligadas ao emprendemento tecnolóxico e innovador en Galicia, sector aínda incipiente pero con grande capacidade para xerar valor, riqueza e emprego de calidade. A entidade agrupa a 100 persoas socias de toda Galicia ligadas ao emprendemento que representan a case 80 empresas e que xeran preto de 7.000 empregos directos. O mapa de startups, unha ferramenta de participación voluntaria para dar visibilidade ás empresas de ámbito tecnolóxico e innovador, amosa 180 empresas no territorio galego. A misión de Startup Galicia é CONECTAR aos emprendedores do noso ecosistema entre si e cos doutros ecosistemas ou que queiran incorporarse ao noso, FORMAR novos emprendedores para que se incorporen ao ecosistema, o potencien e o fagan medrar, e INSPIRAR unha cultura en Galicia que promova e valore o emprendemento e multiplique o potencial laboral da nosa terra.

III. Para a consecución dos seus fins Startup Galicia ofrece, entre outros, estes servizos, para os que conta con equipos directivos e persoal técnico profesionalizados, con preparación e experiencia no ámbito da actividade de emprendemento tecnolóxico e innovador. Amósanse a continuación algunhas das actividades destacadas da asociación

- Newsletter: coas noticias máis relevantes do ecosistema que cada luns chega a máis de 1.000 persoas subscritas na actualidade.
- Furancho: unha canle de Slack onde cada día conectan, comparten, falan, traballan actualmente máis de 1.050 persoas, pertencentes ó ecosistema galego de startups.
- Mapa de startups: mapa para dar a coñecer o ecosistema de startups e empresas innovadoras de Galicia, con máis de 170 referencias na actualidade.

- Eventos: unha serie de eventos formativos e de networking referentes na comunidade.

Dada a converxencia entre os seus obxectivos e fins, ambas as súas partes están interesadas en asinar o presente convenio, que se rexerá polas seguintes

## CLAÚSULAS

### 1. OBXECTO

Constitúe o obxecto xeral deste convenio a colaboración para o desenvolvemento por parte de Startup Galicia de actividades e programas específicos de apoio ao emprendemento innovador que complementen, potencien ou reforcen as actividades do IGAPE neste eido durante o período 2023-2024, na procura de sinerxías que teñan un efecto multiplicador dos recursos públicos destinados ao efecto. Por parte de Startup Galicia propóñense as seguintes actividades:

1. **Emprendemento en feminino:** desenvolvemento de encontros onde se faciliten espazos que propicien a xeración de coñecemento, a sororidade e a unión necesarias para promover e visibilizar un ecosistema diverso, forte e paritario.
2. **Pregunta o que queiras (AMAs ask me anything):** eventos nos que o público pode trasladar, de forma directa, todas as súas inquiredanzas sobre un tema en concreto a un ou unha profesional nun espazo privado. Deste xeito, búscase crear un espazo de confianza e seguro que facilite compartir experiencias e coñecementos reais, baseados na experiencia e que achegue valor á audiencia.
3. **Fiadeiros:** Obradoiros formativos nos que se abordan cuestións prácticas relacionadas coa vida dos produtos tecnolóxicos da man de persoas relevantes do ecosistema startup e do emprendemento dixital, expertas na materia.
4. **Un evento** enfocado a conectar empresas de sectores tradicionais coas startups co fin de conseguir unha achega de valor bi-direccional, facendo fincapé nas solucións que as empresas máis innovadoras poden fornecer á industria máis tradicional.
5. Xeración de contidos para o portal do emprendemento innovador (Start In Galicia) que o IGAPE ten en preparación.

O detalle polo miúdo de actividades e programas especifícase no anexo I a este convenio.

### 2. XUSTIFICACIÓN DA UTILIZACIÓN DA FIGURA DO CONVENIO

De acordo ao indicado no expositivo desde convenio, polo nivel de representatividade que Startup Galicia ten no novo empresariado innovador galego, pola súa implantación xeográfica, polo seu carácter multisectorial, polo perfil das empresas e emprendedores aos que atende, pola capacitación e experiencia dos seus equipos directivos e persoal técnico, pola súa especial atención ás necesidades específicas das iniciativas novas, pequenas, e innovadoras, que non están suficientemente significadas noutras organizacións, e pola súa solvencia e eficacia na organización e implementación de numerosas e diversas actuacións desenvolvidas nos últimos anos no eido da actividade emprendedora, considérase que non existe outra entidade que cumpra estes requirimentos no eido do emprendemento innovador e tecnolóxico en Galicia que garanta a realización do seu obxecto.

### 3. COMPROMISOS E OBRIGAS

a) Startup Galicia asume, en termos xerais e de xeito conxunto co IGAPE, o compromiso de organizar, coordinar e desenvolver as actividades necesarias para a execución das actividades e programas descritos no anexo I cos seus propios medios ou contratando os servizos e subministrados necesarios para levalas a cabo.

b) Startup Galicia achegará a documentación xustificativa que acredite a realización e pago das actividades, así como os informes de participación e demais documentos relativos ás persoas emprendedoras e/ou empresas participantes que, de ser o caso, sexan requiridos polo IGAPE aos efectos da correcta xustificación do desenvolvemento das actividades e programas.

c) Startup Galicia difundirá a colaboración do IGAPE en todo tipo de publicidade, información e material relativo á execución das actividades e programas, con suxeición ás normas sobre imaxe corporativa indicadas polo IGAPE.

d) Startup Galicia manterá á disposición do Igape ou de calquera organismo público con capacidade de fiscalización da Comunidade Autónoma de Galicia, tales como Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos a fin dunha verificación in situ, ben por medios propios ou mediante auditor externo. O prazo para a comprobación material de facturas e xustificantes de gasto será de 5 anos desde a finalización do prazo de vixencia do convenio.

e) Startup Galicia someterase á inspección e control do IGAPE co obxecto de supervisar o cumprimento das actividades e programas previstos e que permitan a xustificación administrativa e financeira das mesmas.

f) Correrá a cargo de Startup Galicia contratar aos colaboradores, decidir e proporcionar instalacións, achegar o material e equipamento necesario, así como a difusión e organización necesarias para o desenvolvemento das actividades e programas obxecto do convenio.

g) O Igape comprométese na consecución dos obxectivos deste convenio coa achega económica estipulada e colaborando con Startup Galicia na difusión, organización e coordinación das actividades previstas con carácter xeral e, en particular:

- difusión entre o emprendemento innovador de Galicia dos eventos que organice Startup Galicia.
- propoñer contidos para os obradoiros Fiadeiros.
- organizar os contidos e formatos para o portal Start in Galicia e a periodicidade da súa publicación de forma coordinada con Startup Galicia.
- achegar información de interese para o promoción e estímulo do emprendemento innovador galego a través de Startup Galicia.

#### 4. FINANCIAMENTO

O orzamento máximo do convenio ascende a 61.800 € euros, desagregados da seguinte maneira:

	Orzamento	% Achega Igape	Achega Igape
Actividades de apoio ao emprendemento innovador	61.800 €	80%	49.440 €
<b>Total achega IGAPE</b>			<b>49.440 €</b>

O presente convenio tramitarase como anticipado de gasto conforme ao disposto na Orde da Consellería de Economía e Facenda do 11/02/1998 (DOG núm. 34, de 19/02/1998), pola que se regula a tramitación anticipada de expedientes de gasto. En todo caso a disposición ou compromiso do gasto quedará condicionada á existencia de crédito adecuado e suficiente para financiar as obrigas derivadas deste.

O procedemento para o financiamento estrutúrase da seguinte forma:

### Actividades de apoio o emprendemento innovador

O Igape achegará o 80% custo das actuacións previstas no presente convenio ata un importe total máximo de 49.440 euros segundo a seguinte distribución por anualidades:

2023	24.720 €
2024	24.720 €
Total	49.440 €

Esta cantidade será aboada con cargo á partida 05.A1.741A.6402 dos orzamentos do Igape para os anos 2023 e 2024, na que existe crédito adecuado e suficiente para financiar esta achega, sendo a fonte de financiamento a de fondos propios libres. O anexo II "Memoria Económica" detalla esta contribución.

Startup Galicia achegará o 20% restante en forma de recursos propios (persoal, gastos externos, gastos xerais, outros). Poderá obter axudas, subvencións ou outros ingresos públicos ou privados para as mesmas actividades sempre que o seu importe, engadido á cofinanciación do Igape, non supere o 100% do custe da actividade ou programa. De producirse ese caso, a cofinanciación do Igape reducirase ata axustar a financiación ao 100% do custo.

### 5. GASTOS ATENDIBLES

a) Serán atendibles os gastos de contratacións externas e os de persoal propio de Startup Galicia directamente relacionados coa realización das actividades e programas obxecto do convenio.

b) Os gastos deberán ser realizados e efectivamente pagados dentro do ámbito temporal do propio convenio e, polo tanto, no que atinxe unicamente a actuacións realizadas a partir da data da sinatura do convenio e ata o 15 de novembro de 2024.

c) Será obrigatorio presentar 3 orzamentos previos para todos aqueles gastos de importe igual ou superior a 15.000 € + IVE e xustificar a selección do provedor en caso de non escoller o máis económico. Estas ofertas deben atender o ao artigo 23 da Lei 14/2013, do 26 de decembro, de racionalización do sector público autonómico, respecto da prohibición de presentar ofertas de empresas vinculadas.

d) No caso de que Startup Galicia subcontrate en máis do 50% a prestación dalgún dos servizos financiados con cargo ao orzamento desde convenio, será necesario que teña autorización previa de forma expresa polo IGAPE a proposta da Comisión de Seguimento prevista na cláusula 7 deste convenio.

e) O imposto do valor engadido (IVE) non se considerará gasto xustificable cando sexa susceptible de recuperación ou compensación.

Startup Galicia poderá obter axudas, subvencións ou outros ingresos públicos ou privados para as mesmas actividades sempre que o seu importe engadido ao cofinanciamento do Igape non supere o 100% do custe da actividade ou programa. De producirse ese caso, o cofinanciamento do Igape reducirase ata axustar a financiación ao 100% do custo.

### 6. XUSTIFICACIÓN E PAGAMENTO

O IGAPE abonará o importe da cofinanciación logo da xustificación de Startup Galicia dos gastos realizados. Estas xustificacións deberán presentarse trimestralmente dentro dos 10 días seguintes á finalización do trimestre natural agás a do último trimestre de 2023, que terá que presentarse antes do 15 de novembro de 2023 e a derradeira, que terá que presentarse o 15 de novembro de 2024 como data límite.



A presentación da xustificación de gastos farase de forma telemática na oficina virtual do IGAPE na páxina <https://www.igape.gal/gl/oficinavirtual>, en particular, a través do código de procedemento PE001, achegando copias dixitalizadas da documentación que a continuación se :

1. Solicitude de cobramento.

2. Memoria de execución das actividades realizadas, resultados obtidos e as incidencias máis significativas e do cumprimento das condicións impostas neste convenio.

3. Memoria económica xustificativa do custo das actividades realizadas que conterá:

a) Relación clasificada dos gastos atendibles para cada actuación, con identificación do acredor e do documento, concepto, importe, data de emisión e data de pago.

b) Xustificación dos gastos atendibles: facturas ou documentos de valor probatorio equivalente no tráfico xurídico mercantil ou con eficacia administrativa, incorporados na relación clasificada dos gastos. No caso de que os gastos sexan de persoal que participase nas actividades obxecto deste convenio, deberanse presentar as nóminas e os comprobantes do seu pagamento, dos ingresos a conta do IRPF e da cotización á Seguridade Social, así como un informe de dedicación deste persoal ás actividades e programas do convenio. Non obstante, os xustificantes das retencións do IRPF e das cotizacións á Seguridade Social dos derradeiros períodos cuxo prazo regulamentado de ingreso sexa posterior á finalización do correspondente período de xustificación do convenio, deberán presentarse durante o primeiro mes do ano seguinte.

c) Xustificación dos pagamentos: transferencia bancaria, certificación bancaria orixinal ou extracto de pagamento. Non se admitirán os pagamentos en efectivo.

d) Xustificación, no seu caso doutros ingresos obtidos para financiar a actividade.

e) Cando o importe do gasto atendible (agás os de persoal) sexa igual ou 15.000 € + IVE, as tres ofertas de diferentes provedores, con carácter previo á contratación do compromiso para a prestación do servizo, e xustificar a selección do provedor en caso de non ser o máis económico.

f) Certificacións expedidas polas respectivas Administracións Públicas que acrediten que está ao corrente das obrigas tributarias e coa Seguridade Social, así como a acreditación de non ter pendente de pagamento ningunha outra débeda, por ningún concepto, coa Administración Pública da Comunidade Autónoma de Galicia, ou autorización para que o Igape realice estas consultas polos seus propios medios.

g) Declaración expresa de que as persoas ou entidades contratadas ou subcontratadas para as actividades subvencionadas non están vinculadas con Startup Galicia.

h) No caso de incluír o IVE como gasto atendible, certificación da exención expedida pola Agencia Tributaria ou, no caso de estar suxeita a pro rata, declaración anual de IVE do exercicio anterior (modelo 390) onde se poida comprobar a porcentaxe de pro rata aplicada.

i) Cadro de indicadores segundo modelo que se inclúe como anexo III.

j) Calquera outra documentación ou material que considere necesario presentar para unha mellor xustificación das actuacións obxecto do presente convenio.

k) A documentación dos apartados a), b), c) e d) poderá ser substituída por informe de auditor de contas inscrito no ROAC

En todo caso, o IGAPE resérvase o dereito de solicitar toda a documentación que considere precisa para acreditar a realización das actuacións obxecto do presente convenio e calquera outra que estime oportuna para a correcta xustificación do gasto e o seu pagamento.

Procederá a minoración das contribucións cando as actuacións desenvolvidas e xustificadas ao abeiro do presente convenio non acaden os importes dos gastos xustificables e sempre que esta minoración non supoña unha realización deficiente do proxecto, de acordo co establecido na cláusula terceira e cuarta de compromisos de Igape e Startup Galicia.

## **7. APROVEITAMENTO DE RESULTADOS**

As partes asinantes conveñen en permitir a explotación conxunta polas outras partes, directa ou indirectamente, dos resultados das actividades do convenio, isto é, informes, traballos, aplicacións informáticas, webs, logos e en xeral calquera instrumento obxecto de propiedade intelectual que sexa desenvolvemento directo das tarefas e actividades obxecto do presente convenio.

## **8. COMISIÓN DE SEGUIMIENTO**

Establécese una Comisión de Seguimento composta polo director xeral do Igape, que exercerá de presidente, e o presidente da Startup Galicia e, como mínimo, por dous vogais adicionais, un por cada unha das dúas institucións.

Estes vogais poderán ir variando, en persoa e número, en función da temática para tratar en cada unha das reunións da Comisión.

Pola súa banda, tanto o director do Igape como o presidente da Startup Galicia, poderán delegar a súa asistencia e voto na persoa que cada un deles designe.

Esta Comisión actuará como órgano de vixilancia, seguimento e control do establecido neste convenio.

A Comisión de Seguimento reunirse a instancia de calquera das partes asinantes.

O funcionamento da Comisión de Seguimento farase ao abeiro do réxime xurídico dos órganos colexiados contido na sección III, co capítulo I do título I (artigos 15 e seguintes) da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

## **9. PUBLICIDADE**

De conformidade co artigo 15 da Lei 1/2016, do 18 de xaneiro, de transparencia e bo goberno e o Decreto 126/2006, do 20 de xullo, polo que se regula o Rexistro de Convenios da Xunta de Galicia, o Igape e a Vicepresidencia Primeira e Consellería de Economía, Industria e Innovación publicarán no Diario Oficial de Galicia, no Portal de transparencia e Goberno aberto e na súa páxina web oficial o importe da prestación económica concedida ao abeiro deste convenio e a entidade destinataria desta, polo que a sinatura do convenio leva implícita a autorización para o tratamento necesario dos datos da entidade e a referida publicidade, así como a súa cesión por parte do Igape aos órganos competentes da Vicepresidencia Primeira e Consellería de Economía, Industria e Innovación.

Startup Galicia deberá facilitar toda a información necesaria para que o IGAPE cumpra coas obrigas recollidas no título I da Lei 1/2016, do 18 de xaneiro, de transparencia e bo goberno. As consecuencias do incumprimento destas obrigas serán as establecidas no artigo 4.4 da citada lei.

## **10. MODIFICACIÓNS**

Calquera modificación nas actuacións recollidas neste convenio deberá ser proposta por unha das partes, directamente ou a través da comisión de seguimento, e formalizarse a través da subscripción da correspondente addenda. En ningún caso poderá supoñer un incremento do orzamento.

O presente convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira. A devandita modificación terá por obxecto a redución do volume das obrigas ou a ampliación do seu prazo de execución.

## 11. RESOLUCIÓN

O convenio extinguirase polo cumprimento das actuacións que constitúen o seu obxecto ou por incorrer en causa de resolución.

Son causas de resolución:

- a) O transcurso prazo de vixencia do convenio sen terse acordado a súa prórroga.
- b) O acordo unánime de todos os asinantes.
- c) O incumprimento das obrigas e compromisos asumidos por parte dalgún dos asinantes. Neste caso, calquera das partes poderá notificar á parte incumplidora un requirimento para que cumpra nun prazo de 10 días hábiles coas obrigas ou compromisos que se consideran incumplidos. Este requirimento será comunicado á Comisión de Seguimento do convenio e ás demais partes asinantes. Se transcorrido o prazo indicado no requirimento persistira o incumprimento, a parte que o dirixiu notificará ás partes asinantes a concorrencia da causa de resolución e entenderase resolto o convenio.
- d) Por decisión xudicial declaratoria da nulidade do convenio.
- e) Por calquera outra causa distinta das anteriores prevista no convenio ou noutras leis.

Se cando concorra calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a súa liquidación.

## 12. PROTECCIÓN DE DATOS DE CARÁCTER PERSOAL

En virtude do disposto no artigo 26 do Regulamento (UE) 2016/679, xeral de protección de datos (RXPD) e na Lei orgánica 3/2018, do 5 de decembro, de protección de datos persoais e garantía dos dereitos dixitais (BOE nº 294, do 6 de decembro), Igape e Startup Galicia adquiren a condición de encargados do tratamento e comprométese a:

- Non utilizar nin tratar datos de carácter persoal con finalidade distinta á execución do convenio, non comunicar os datos baixo ningún concepto a terceiras persoas, nin sequera para a súa conservación e, en especial, non reproducir, nin publicar, nin difundir ningunha información acerca dos datos.
- Garantir o cumprimento das medidas de seguridade establecidas, así como a súa correcta implementación.
- Ao termo da relación por calquera causa, os datos de carácter persoal incluídos en calquera soporte aos que tivesen tido acceso as partes deben ser destruídos.

O incumprimento destas obrigas fai responder ás restantes partes das infraccións que cometa coma se ocupase a posición de responsable do tratamento.

## 13. RESPONSABILIDADE

A subscrición do presente convenio non implicará relación laboral contractual ou de calquera outro tipo entre os profesionais ou entidades que vaian desenvolver as actuacións obxecto deste convenio e o Igape, de tal xeito que non se poderá esixir a este Instituto responsabilidade ningunha, nin directa nin subsidiariamente, polos actos ou feitos acaecidos no desenvolvemento do devandito convenio.

## 14. AUTORIZACIÓNS

Startup Galicia consente expresamente a inclusión dos datos relevantes e persoais deste convenio nos rexistros públicos que proceda, de acordo co Decreto 126/2006, do 20 de xullo, polo que se regula o Rexistro de Convenios da Xunta de Galicia, así como poderá exercer os seus dereitos de acceso, rectificación cancelación e oposición respecto do contido dos rexistros antes citados, ante a

Dirección Xeral do Instituto Galego de Promoción Económica, sito no complexo administrativo de San Lázaro s/n, 15707 Santiago de Compostela, en aplicación do disposto no Decreto 126/2006.

Este consentimento esténdese a autorización para a cesión dos seus datos á entidade financeira na que se aboe o pagamento, ao Diario Oficial de Galicia e ás demais cesións previstas na lei.

Tamén comporta a autorización ao Igape para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia, no caso de que se deban presentar estes certificados en fase de emenda, logo de que a consulta polo Igape e non obtivese resultado favorable, a data de expedición dos certificados pola Administración correspondente deberá ser posterior á data de consulta polo Igape, o que se comunicará no requirimento de emenda da documentación.

## 15. VIXENCIA

Establécese como prazo de vixencia o comprendido entre a data da sinatura do convenio e o 30 de decembro de 2024, sen prexuízo de que os gastos atendibles deberán estar realizados no período o comprendido entre a data de sinatura do convenio e o 15 de novembro de 2024, data na que deberán estar realizados todos os eventos programados ao abeiro do convenio.

O convenio poderá ser prorrogado por un período non superior ao inicial mediante acordo das partes adoptado antes do vencemento.

## 16. NATUREZA E XURISDICIÓN

O presente convenio ten natureza xurídico-administrativa, quedando fóra do ámbito de aplicación da Lei 9/2017, do 8 de novembro, de contratos do sector público, de conformidade con seu artigo 6.2, e para calquera cuestión litixiosa que se derive do mesmo, será de aplicación a Lei 29/1998, do 13 de xullo, reguladora da xurisdición contencioso-administrativa.

As partes comprométense a resolver de común acordo calquera controversia que puidese xurdir sobre a interpretación ou execución deste convenio, someténdoa á Comisión de Seguimento prevista. De persistir o desacordo, someterase á xurisdición contencioso-administrativa, de conformidade co disposto na Lei 29/1998, do 13 de xullo, reguladora da dita xurisdición. En caso de conflito as partes acordan o sometemento á Xurisdición Contencioso-Administrativa.

## 17. NORMATIVA APLICABLE

Para todo o non previsto neste convenio aplicarase o previsto no acordo do Consello da Xunta de Galicia do 27 de marzo de 1991 (DOG do 30 de abril), sobre subscripción dos convenios de colaboración con particulares que outorguen as Consellerías da Xunta de Galicia, os Organismos Autónomos ou Entes de dereito público da Administración Autonómica, a Lei 1/2016, do 18 de xaneiro, de transparencia e bo goberno e o Decreto 126/2006 do 20 de xullo polo que se regula o Rexistro de Convenios da Xunta de Galicia. Será tamén de aplicación o disposto no capítulo VI do título preliminar da Lei 40/2015, do 1 de outubro, de Réxime Xurídico do Sector Público, polo que se regulan os convenios do sector público.

En proba de conformidade, ambas as dúas partes asinan o presente convenio o 19 de xaneiro de 2023.

O Director Xeral do Igape

O Presidente de STARTUP GALICIA

Fernando Guldrís Iglesias

Daniel Cerqueiro García

## ANEXO I

### ACTIVIDADES A DESENVOLVER

Ao abeiro deste convenio a asociación comprométese a levar a cabo as seguintes actividades:

1. Emprendemento feminino.
2. AMAS.
3. Fiadeiros.
4. Empresas "tradicionais" e startups.
5. Portal do emprendemento do IGAPE.

#### 1 Emprendemento en feminino.

Desenvolvemento de encontros onde se faciliten espazos que propicien a xeración de coñecemento, a sororidade e unión necesarias para promover e visibilizar un ecosistema diverso, forte e paritario.

**Impacto no Ecosistema:** neste evento poremos nome, apelidos e rostro ás mulleres que forman parte dos equipos das startup galegas, con especial foco naquelas mulleres que desenvolven roles tradicionalmente desenvoltos por homes. Tal é o caso dos postos relacionados co desenvolvemento de tecnoloxía, o liderado de equipos ou a xerencia da compañía. Deste xeito, pretendemos crear referentes para que a diversidade de xénero sexa unha realidade no ecosistema emprendedor galego que estamos construindo.

#### 2 AMAS (Ask Me Anything, pregunta o que queiras).

Desenvolvemento de eventos presenciais nos que o público pode trasladar, de forma directa, todas as súas inquiredanzas sobre un tema en concreto a un ou unha profesional nun espazo privado. Deste xeito, búscase crear un espazo de confianza e seguro que facilite compartir experiencias e coñecementos reais, baseados na experiencia e que achegue valor á audiencia.

**Impacto no Ecosistema:** este evento achega á comunidade a posibilidade de coñecer de forma directa e cercana a persoas con ampla traxectoria e experiencia en temas relacionados co emprendemento e coa fundación, xestión e/ou venda de startups, entre outras cuestións. Estes espazos de intercambio de experiencias permitirán que as persoas que forman parte do ecosistema emprendedor galego poidan compartir as situacións ás que están enfrontándose nas súas startups, aprendendo dos erros cometidos, ferramentas empregadas e metodoloxías seguidas por outras startups que atravesaron situacións similares con anterioridade.

#### 3 Fiadeiros.

Execución de obradoiros formativos nos que se abordan cuestións prácticas relacionadas coa vida dos produtos tecnolóxicos da man de persoas relevantes do ecosistema startup e do emprendemento dixital, expertas na materia. Ata o momento, a asociación organizou tres fiadeiros sobre desenvolvemento de negocio e no-code, xuntando a máis de 70 persoas do sector.

**Impacto no Ecosistema:** os fiadeiros atenden ás necesidades concretas de formación do noso ecosistema polo que con esta actuación conseguírase cubrir eidos formativos para os que non é posible atopar información adaptada ás particularidades das startups galegas.

#### 4 Conecta Empresas

Desenvolvemento dun evento enfocado a conectar empresas de sectores tradicionais coas startups co fin de conseguir unha achega de valor bi-direccional, facendo fincapé nas solucións que as empresas máis innovadoras poden fornecer á industria máis tradicional.

**Impacto no Ecosistema:** este evento pretende axilizar a comunicación entre os sectores máis tradicionais do sector produtivo galego e as startups. Froito deste achegamento, agárdase potenciar

a capacidade das startup galegas para achegar innovación á empresa tradicional e, á súa vez, que estas últimas coñezan a potencialidade do ecosistema emprendedor galego para cubrir as súas necesidades de tecnoloxía con solucións km0, creadas dentro do propio territorio galego. Encaixa coa liña de axudas "Activa Startups" lanzada polo IGAPE.

### 5 Portal do emprendemento do IGAPE.

Esta actuación comprende a xeración de contidos para o portal do emprendemento que o IGAPE ten previsto poñer en marcha. Esta actuación dá continuidade ás accións que Startup Galicia vén xa desenvolvendo dende os inicios da súa fundación, co fin de achegar información ao ecosistema sobre noticias de interese, formacións ou convocatorias de axudas. De forma xeral, os tipos de contidos que Startup Galicia elaborará para a súa posterior difusión a través do novo portal do IGAPE son:

- Novas do ecosistema, tomadas de diversas fontes, con contidos estendidos para a súa re-difusión.
- Contidos sobre os actores do ecosistema, centrándose especialmente nas persoas emprendedoras e as startups de novo nacemento, en formato de artigos.
- Contidos de fondos de valor, sobre tendencias, conversas con persoas expertas de diversos sectores, etc, en formato de artigos e de podcast.
- Contidos sobre convocatorias de axudas do IGAPE dirixidos aos ámbitos de interese das startup.

De forma paralela, Startup Galicia seguirá desenvolvemento e mantendo a newsletter semanal, o calendario de eventos, a canle de Slack "O Furancho" e o Mapa de Startups.

### Resumen actividades e custo

Concepto	Encontros	Custo total	Beneficiarios
Emprendemento feminino	1/ano	4.000 € / sesión	
AMAS	4/ano	300 €/sesión 20 pax	160
Fiadeiros	4/ano	800 €/sesión 30 pax	240
Conecta empresas	1/ano	5.000 € / sesión	
Portal emprendemento	350 horas/ano	17.500 € / ano	
<b>TOTAL</b>		<b>30.900 € / ano</b>	

### ORZAMENTO E ACTIVIDADES POR ANOS

#### ANO 2023

**Total 2023: 30.900 €**

**Aportación do IGAPE 2023: 24.720 €**

#### ANO 2024

**Total 2024: 30.900 €**

**Aportación do IGAPE 2024: 24.720 €**

## ANEXO II MEMORIA ECONÓMICA

Para a realización das actuacións obxecto do presente convenio o IGAPE contribuirá cun máximo do 80% do orzamento prantexado por Startup Galicia, isto é, un total de 49.400€; 24.720 € con cargo á partida orzamentaria 06.A1.741A.6402 no exercicio 2023 e 24.720 € no exercicio 2024, sendo a fonte de financiamento a de fondos propios libres

Para todas as actividades e programas recollidos no anexo I que STARTUP GALICIA desenvolva, o IGAPE contribuirá en contrapartida coas achegas máximas fixadas por cada unha das actividades previstas.

Cada un dos participantes do convenio fará a súa achega do seguinte xeito:

IGAPE	STARTUP GALICIA
<ul style="list-style-type: none"> <li>● Achega económica para gastos xustificadas por STARTUP GALICIA na realización das actividades e programas que se recollen no anexo I.</li> <li>● Colaboración coa STARTUP GALICIA no deseño dos eventos.</li> <li>● Realización de accións de difusión, comunicación, e publicitarias relativas a actividades e programas en coordinación coa STARTUP GALICIA.</li> </ul>	<ul style="list-style-type: none"> <li>● Realización cos seus propios medios ou contratando os servizos e subministros necesarios para levar a cabo as distintas actividades do convenio.</li> <li>● Organización, coordinación e desenvolvemento das actividades necesarias para a execución dos programas descritos nos anexos.</li> <li>● Persoal propio.</li> <li>● Selección de provedores.</li> <li>● Contratación e pagamento de todas as actividades.</li> <li>● Achega da documentación soporte.</li> <li>● Coordinación e realización de accións, difusión, comunicación e publicitarias.</li> </ul>

O resumo dos custos estimados por tipo de actividade é o seguinte:

Tipo de actuación	Nº de encontros	Custo unitario	Custo total	Achega IGAPE
Emprendemento feminino	2	4.000€	8.000€	6.400€
AMAS	8	300€	2.400€	1.920€
Fiadeiros	8	800€	6.400€	5.120€
Conecta empresas	2	5.000€	10.000€	8.000€
Portal do emprendemento do IGAPE			35.000€	28.000€
<b>TOTAL</b>	<b>20</b>		<b>61.800€</b>	<b>49.440€</b>

(\*) variable segundo temática/formato

A distribución por anualidades realizarase do seguinte modo:

2023

Tipo de actuación	Nº de encontros	Custo unitario	Custo total	Achega IGAPE
Emprendemento feminino	1	4.000€	4.000€	3.200€
AMAS	4	300€	1.200€	960€
Fiadeiros	4	800€	3.200€	2.560€
Conecta empresas	1	5.000€	5.000€	4.000€
Portal do emprendemento do IGAPE			17.500€	14.000€
<b>TOTAL</b>	<b>10</b>		30.900€	24.720€

2024

Tipo de actuación	Nº de encontros	Custo unitario	Custo total	Achega IGAPE
Emprendemento feminino	1	4.000€	4.000€	3.200€
AMAS	4	300€	1.200€	960€
Fiadeiros	4	800€	3.200€	2.560€
Conecta empresas	1	5.000€	5.000€	4.000€
Portal do emprendemento do IGAPE			17.500€	14.000€
<b>TOTAL</b>	<b>10</b>		30.900€	24.720€

### ANEXO III: INDICADORES

Nivel 1	Nivel 2	Nivel 3	Nivel 4	Total Realizado	Homes	Mulleres
1.- Nº de persoas participantes (Desagregado por sexo) (ud.)						
	Idade					
			Persoas menores de 25 anos*			
			Persoas entre 25 e 54 anos*			
			Persoas maiores de 54 anos*			
2.- Nº de empresas beneficiadas (ud.)						
	Tipo de empresa					
			PEME (Pequenas e medianas empresas)*			
			Microempresas*			